

皇清文穎續編

皇清文頴續編卷十七

雜著

平定回部文

謹序

朱珪

臣  
伏見

皇上執天樞秉神斷五年之間全定西極決勝二萬  
里而遠鏡照機張不爽毫刻籍伊犁縲名王蕩  
餘氛降諸部有罪必誅無遠弗庭發之

九重之上而收之八荒之外亘古以來未之有也

臣

嘗竊怪漢司馬相如作封禪文班固著典引其  
文瑰竒而非事實或夸珍符喻封巒至於祖伊  
耆臣素王尤不可爲典唐柳宗元作貞符及雅  
詩韓愈作碑銘然是時唐無他功憲宗平淮西  
耳千里之叛厯乃克之以爲如天之勲不可企  
及豈足語於

聖神之萬一乎

臣伏讀

御製太學碑文及

開惑論兩篇

睿畫大猷功歸

上緯蓋帝堯之欽昊有虞之勅命至矣曷以加茲

臣

謹案易稱大人與天地合其德又曰天且弗違

言天固人之所自爲也

臣

竊據事徵典作文一

篇具道

天子之功德與

天合契者頓首以獻其文曰

上圖昆侖疑爲廣輪其外環以裨海中貫星辰有攸  
天德爲天下君權輿龍圖之紀不可得稽蓋靡  
顯於軒轅于是鞭應龍平涿鹿五十二征天下砥屬  
少昊徠韃靼顓頊絕九黎堯平九夷之沴舜剪緡雲  
之裔姒子以來于傳可記也且夫德大者包天垓德  
小者疆地戒知有所不照時有所不逮漢斬郅支訖  
於羈縻唐棄維州築室道謀宋之有國北剋西鄙鄜  
延環慶原渭之外委之夏人拱手不敢西牧終拓跋

九世而降於元元失其鹿明來擒之始藩哈密中葉  
而毀嘉峪關外亘土魯番亦不刺據乎西海瓦刺窟  
乎賀蘭近塞榆林北爲河套毛里孩火篩吉囊俺答  
蓋先後甌脫其間明之守臣不敢偵瞭兩兒辨日孰  
胖近遠棄其玉斧袖手莫斷公卿訟於槐棘疆場割  
其土版戶楹不知遑問四方厥德弗馨

帝用眷命於我

大清也惟我

太祖以十三甲破葉赫輝發所向摧摺遂有遼瀋之  
陽至於

太宗長弓大鎧駕兩白龍廕松山降朝鮮蒙古列部  
聯爲外藩功莫劉焉

世祖受之

天乃全付所有

聖祖旣拔三曠海訖天幹極西北隅有厄魯特部爲  
阿魯台之裔

天命蔡之

皇祖是用三駕天戈捐乎月窟取其鱣鯢而赦其劓  
刑也彼酋不悛窺我西藏

世宗赫怒遂定青海莫我敢抗殲之於厄爾得尼招  
賊用大創我

皇上日夜思

列祖之光明自

天榮鏡昭德之致於有萬方焉南渟金川雕題羣首



之國莫不回面樹領企爲內臣

天將以準噶爾全部暨諸回國二萬里地授之我

皇於是綽羅斯之內訶阿睦爾撒納之龔超大小和

卓木之陸梁所以

啟大功而擴我疆也夫時者事之鍵知者決之斷非  
鍵曷行非斷曷成當敏關之機至羌莫得乎要領

帝曰時哉操刀中肯爰麾兩牙剿阿爾泰山而下飲  
馬於河是時羊頭之鎗未殷其鋒飛壘之鏃未抽乎

室犁伊犁庭倂大台吉若泰風之振擇大治之爛雪  
易于承蜩而掇之也旣而拚蠖蠓嘯魁戴忠者握節  
辨者守黑

皇帝不疑曰是不可不大殛再張

天軍罪人必得然後鍾山之子化爲鸚鵡負危竄竊  
自相灰爛首惡械相顧之尸羣狙驚會稽之箭潰抵  
破瓦無有存者從風而靡莫不歸我朝蟬封臬臬之  
長徠虎脊魚目之馬東西布魯古特髮奚繩橋之路

復通右部哈薩克塔什罕蠻觸鵠蚌之爭遂捨重舌  
九譯拜於

闕下與

天無極

功業豈不大哉彼波羅泥都霍集占者我之放豚出  
苙負塗背我大恩地荒城阻孰施長鞭

帝曰是戕我義臣不可赦原易將

授鉞

天討是申庫車阿克蘇烏什和闐以次悉平

王師電撤焱發行萬餘里攻葉爾羌未下退塹乎黑  
水當是時賊衆數萬我軍三千守汧城而鑿穴飲疏  
勒之飛泉自非

一人辰居斗運天輪闔張先時輻湊強兵鐵騎儵眴  
馳驟曷克拔重圍而破勅寇若撲策而數計者豈非  
天授哉及乎大師長驅寇窘而遁冒羅布天棄其室  
家乃收喀什噶爾葉爾羌之民而窮二酋之所臻三

戰三捷至於拔達山傳檄授首所部悉臣子夜之尸  
異處相繇之身不環蕩雷轟以爲池平阿耨以爲田  
然後般師偃伯燔柴挈臯以告功乎

皇天也於是諸王三公六卿咸進曰

皇上獨秉天斷功成甚偉五年以來闢地二萬餘里  
伊古所稱無有倫比請上

尊號協于

泰元垂之萬禩

帝曰吁惟

天之佑惟

祖

宗之志其克有成予其敬事諷曰

帝躬裸於

太室徧告

山陵暨

上下神祇名山大川咸秩酬功行慶莫不昭晰乃

天心攤日暹穹碑屹乎岫巘揚

大文之炎炎歸鴻名于

泰一參帝典以爲三惟乾乾乎終日式

上帝之所監口中必贊觀天執時有黃帝之明焉惟  
德動天無遠弗届有重華之文焉震用伐鬼方三年  
克之有高宗之斷焉崇墉屹屹四方以無拂有文王  
之勲焉彼漢唐之所槩肇宋明之所揭揭又奚云乎  
天道畋穆無聲無言

聖人法之不息益勤惟動俟志有開必先雷殷龍見  
合謀於神虛而不有是爲乾元上穆流乎三光下配  
藜乎八簣

天哉

皇哉

皇哉

天哉遂作頌曰惟

天九重萬動之宗孰協於極我



皇之德衡氣發機克灼知之非惟知之

皇允釐之茫茫大地戒以山海同於

天光惟

皇德所逮彼岨西域曠莫之格闕彼白澤我執而弗

射面

天者懷背

天者威或枿而芽火風其灰我出我師崑崙之西坡

陀萬里今勞其歸非常之原莫敢或量今成大功

天心克彰祇祇翼翼敬

帝之則劼輦勞謙萬年無極

皇上五旬萬壽文

謹序

朱筠

臣

聞二雅所紀君莫盛於成周而自昔稱善頌  
禱其君者莫如周公召公召公之詩曰俾爾彌  
爾性繼之以土宇販章之厚又繼之以受命之  
長蕃祿之康然後曰純嘏爾常周公之詩曰俾  
爾戩穀繼之以吉蠲之孝日用飲食之質然後  
曰萬壽無疆又曰如南山之壽夫先言其德次  
言其諸福之備而申言之以極其頌禱之詞至

今取天保卷阿二詩讀之其君煜然既聖且神  
垂千萬年著之於經以爲紀實乃知言之必有

本也臣伏見

皇帝陛下祇事

天

地昭假

祖

考翼翼乎爲百神之主文德烏奕武功剋服乎荒甸

中外三古以來未之聞焉

天子方穆然法宮之中勤政理求民莫治浹化滂

皇帝大孝色養

慈寧愉愉怡怡事

皇太后左右者五十年於茲矣

御極之二十五年八月十有三日恭遇

皇上初生之辰羣臣上壽頌述

聖德

臣

愚以爲自漢洎唐著功業彰符命若司馬相

如封禪文班固典引柳宗元貞符其詞美矣然  
稱引失實無當於詩書之旨臣謹悉心殫思作  
文一篇具載

今日功德之大政治之實竊思敷揚

聖天子之光明所被傳之無疆臣不勝惶恐歡忭之

至謹頓首上文

太素之時若烟若雲蒼黃初胎粵生聖神官帝家王  
青雲繞而蒼牙君九井澤而炎氏昌大電大星昊朱

軒黃頊文掌龍北辰化叟唐發丹陵虞生姚皐神珠  
微胸夏產石紐莫不上轡列宿之芒下貫山河之絡  
靈翺祥香燦燦燦燦蓋詳緯而畧經信汗漫而不能  
說也洪惟我

大清之德嶽峻瀆衍汪濊碣磈日暎所照天圖初左  
子開丑闢之元時惟

帝女旣吞朱果

皇天實肇生我家

列祖嗣之融融繩繩權輿開拓俯平仰成皇哉我  
清受命之徵也

太祖誕命雲霧雷響葉赫戡輝發獵坐鹿角以迓庥  
而權輿乎家法赫矣

太宗錦甲瑯弓驂乎大白小白之神驥顧盼千里而  
御兩龍盡服東北蒙古部分當時中夏已厥角望風  
焉遂荒有乎

二京以東值明葉之中傾繫文旌而武嬉主釋網綱



朝濟是非七德五材之用勞焉而無所統春遊秋豫  
之典曹焉而無所見政不相通謀無成斷民失其依  
天移厥眷於時我

世祖撫而有之膺

帝籙麾天戈天下之民依之若父母歸之若江河非  
至德而何哉

皇帝體

聖祖之帡幪踵

世宗之獲矩元氣旋斡于北辰大順累洽乎東戶方  
將鑒前世之所失述

列聖之所作礪日滌月精神咸覩

上天健行法以主之四極四和熙熙靡靡

御極以來有事

天

地歲見以四而

祈穀

常雩用禱乎民事榮達燎升馨聞塞空日春月秋萬  
庭六宗咸秩而豐

太室奉禩四享而一祫

列祖在天焄蒿訢洽鸞和春噦東西展行嘗再

詔禮官諏吉辰沿綠江睎長白以轅乎朱敦

皇帝孝思追維本根惻隱優渥仁至禮鉅

皇帝之上事

天

祖承承而著著也天廟之舍日月會躔

皇帝躬耕於藉田三推之禮

詔加以四用恪恭於民事歲或雨暘八蜡之不時則  
必訓於職官以除之徵於籲號以祈之每下重農之  
令數有蠲租之事大江輸漕歲以億萬舳艫上濤截  
留通變會

駐蹕以觀河龍門擘而波悍挾淮濟其吞江爭赴海  
於夕旦維揚財賦民居魚貫仰屋危隄夜卧駭歎

帝命濬川以築石蛟鼉降而不濶湜清黃其別分鑠  
支祁而永奠於千萬年仡仡高岍

皇帝之盡力於民事計久遠也秋則獮于木蘭用以  
講武

國家東北蒙古諸部爲我內臣桓桓虎旅打虎索倫  
天子大蒐覲其名藩錫賚金幣款洽燕言蓋疆幹弱  
支爲用武之所存

皇帝曰以詰戎兵而禹跡遵也於焉金川小醜旣翦

既劉彼準噶爾爲我仇讎繼

列聖志四衛拉收葉爾奇木哈什哈爾我屯我田我  
民我子牽渥洼之神駒俘于闐之寶玉敝悅陸離五  
色十穀

皇帝大武如此其卓踔也臨乎成均考禮釋菜爰儀  
鄒魯

帝車是稅揆符道心顧瞻禮器留繖尙想銘川得契  
然後

御經筵召疑丞涵濡淵蛸統一德成進儒臣而陳史  
資千秋之治平

萬幾餘暇從容乙覽廣紉縵於舜琴証岫嶠于禹範  
御製所錄二集三碑煌煌峨峨固已宣中和而燭垠  
垓矣

皇帝之大文賁天人也

皇帝坐乎玉牀璇題之中環瀛冒海無不達通內則  
六卿諸省大吏章牘奏上日千篇計大昕所請膳畢

則下如天行度不憇寸舍十日先後

帝迺御門諸曹咸至廷見百官大臣承

詔起居記言奏未行者是日悉頽耳目豁達開門明  
憲越歲

皇帝時巡方岳而膏澤沛暢尤浹於南江

皇帝之勤政乾乾而德流敦龐也治化成矣永鴻名  
矣四巡所至

皇帝奉



皇太后以行玉食之養萬方有截乃者冠帶入版之  
國自天以西且至於西王母之屬進觴祝焉至哉  
皇帝之孝德廣所服也由是中外邇遐並翕然稱曰  
皇帝功德與天無極今年

聖壽五十初生之辰應天地得合之符成圖書大衍  
之策日晷景平月輪華液五麟十鳳之光著東鸞西  
鰈之應契宜披瑞圖綜祉輟焜燿壽域歌舞令節庶  
幾講論發揮

天子之盛德

皇帝讓善不許曰子其諄

壽康宮

皇太后前奉觴上壽明年

聖母萬壽其合萬國之歡祝釐以酌焉於是

詔止崇美而不飾却珍貢而勿覲撫嘉祚以篤恭叶

延洪而永慶懿哉純乎

大孝至聖矣夫符者應也實者本也本貞而應動實

近而符逮今

聖天子孝推四海之準德握三辰之元功俾二儀治

垂萬年既有其本與實矣

臣竊謂

今日紀之五典而爲六匹之二帝而爲三言之寶也  
若夫嘉禾生而德茂醴泉涌而仁覃扇厨則萐莆生  
涼遊椒則駃騠服驂福草葱蒨於紫庭文鱗騰物于  
清池角端之獸通乎四遠華平之枝正乎中階所謂  
調中呂而青雲升照方諸而元水滋夫固必致之理

相召之機何足以會五福之極本二雅之詩哉語曰  
海者水歸之仁者壽宜之自非

至聖之德而備福若斯者乎

皇太后七旬萬壽經壇勝文

齊召南

伏以

至治重熙率土慶阜昌之福

鴻圖健運觀民紀清晏之祥迓純嘏於

璇宮統元會長瞻

愛日翼陽和於

莘輅合人天丕冒

慈雲山效嵩呼潮音海會欽惟

崇慶慈宣康惠敦和裕壽純禧恭懿皇太后陛下

星渚凝床

慶都集祉

福全坤厚煦品物以長春

德啟乾行熈勳華而立極欽惟

皇帝陛下

道隆位育

治洽修和

奠羣生於仁壽之鄉

登上理於皇王之表亮

天工則克勤克儉永賴始見平成續

祖烈則丕顯丕承震疊原爲式序迺者由庚道泰三  
階炳玉燭之光華泰年豐八柱鞏金甌之固作乂及  
流沙瀚海有血氣莫不尊親效靈自龜書馬圖罄苞  
符咸來貢獻勤

堯咨而底績黃流之九曲俱澄乘

禹載以圖功碧澥之三疊永奠桑麻蔚乎千頃陽侯  
率職而衛金隄廬舍環以萬家河伯襄工而移貝闕  
奏仙韶於

椒殿自天豐芳潔之咳蘭奉軒鏡於

護庭匝地零濃瀼之醴酒欣逢景運爲千載一時永  
綏

天樂之符幸際昌期正兩江萬姓願覲

帝光之會億壬年



鸞輿三駕適倅舜典巡方計乙歲

鳳旆重臨正合虞書考績額手誦十行

明詔維

皇恩實廣

慈恩歡呼萃九有羣黎知

帝樂必同民樂河壇載蒞旣舉菱沉璧以永安海嶼  
爰咨更樅石儲薪而孔固信矣

宏仁格

帝化磧鹵竟作桑田猗歟

至孝奉

親觀康衢如遊庭戶蒼精從而龍旂展江南北草木  
俱榮靈胥靖而翠陌寧浙東西潮聲送喜跨六橋爲  
閣道桃霞與柳浪爭新峩雙闕於高峰碧祀共金鋪  
交暎耕夫紅女快祝昇平皓叟黃童欣歌樂愷謂  
聖主欽繩

祖武侯含哺鼓腹千百國並躋春臺惟吾儕幸奉

慈娛願日升月恒億萬年宏開壽域瞻喬星之  
睿藻榮光上燭層霄沐霽霽之

恩波含生羣霑渥澤巍巍蕩蕩治已登乎陶唐有虞  
皞皞熙熙人同樂夫華胥東戶臣等慶霽臨景湛露  
承流效天保之歌九如衍箕疇而備五福

皇仁春洽敬摠葵悃以傾陽

聖壽天齊竊比華封而獻祝謹遴選僧伽百員於某  
月日啟建道場洪宣佛號五色雲起南山獻介壽之

杯萬歲聲傳東海下  
添籌之鶴會八部天龍而讚誦  
瑤妃金母咸稽首而拱

慈輿徧百神河嶽以懷柔  
威鳳祥麟自應圖而昭

聖瑞爛日華於

蓬萊闕下鏡涵萬頃琉璃  
飛花雨於兜率宮前屏展  
千層錦繡伏願

壽同喬岳

福並滄瀛

和氣凝祥聯瑞繭嘉禾而誌喜

至誠保泰盡燭龍火鼠以瞻光祝

慈慶於年年長賀太平有象奉

徽觀於歲歲益徵悠久無疆稽章亥之黃圖南北爲  
經東西爲緯遂以定磐石之宗披云亭之玉策八千  
爲春八千爲秋彌以增皇軒之紀矣

皇上六旬萬壽文

吳省欽

易奕哉真符之闡繹也稽古天靈鏗岳愷胡洮之世  
迭辟繼道斟元陳樞以立易威亭品其形銷迪其氣  
迺挺洞萬彙光際無臬是以旋復之提龍興鸞集建  
太始之元鈞環轂轉君有五期爲世億齡蒼牙黃軒  
睟乎後已何論姚姒或者稱五帝任仁義三王任知  
勇濬喆之誕必合靈契故里社鳴聖人出黃河激聖  
人生玉斗金篴儲算賜齡若壽區若水成紀崑山樞

紐薦符翼房顯曜尙已至夫玉英紫氣七鳳五麟神  
光異香之貺萑花芝葉之莠亦往往稱引符瑞洎金  
鏡綬帶戚里進饋結絲露囊土庶贈遺醇酎宴樂張  
慶令節嘏嘉祚于元命延洪庥于昌期斯樞輪乎權  
惟

聖清之奠馨業也乾苞鍾叡坤紐闡禔神動天隨用  
騰華乎震維叶千年而啟運馭三統而居尊

列祖

列宗重光累洽錫羨顯統蘿圖席亨三靈泰焉維序  
維

皇體真得極暉昌

五朝神運四與卬暢乎背陽報德常羊蹕通之維俛  
燭乎空桐丹穴太平大蒙之紀丙明炳而辰振美斯  
龍飛所由建元也主鬯肅若

郊壇必親繩鏐鏤琥肆秩無文縮酌侑酌升歆

九廟以致福受釐而天下咸欽



皇帝之誠介祉

璇闈驩臚萬國燦火絢綵昌歆調饌修序冲景波瀾  
巖館服定省清溫之行

頤性時泰徽施

璆檢以莫不增而天下咸景

皇帝之孝農祥分屬卽康功田功四黼雖登庸調時  
豁田賦膺積蠲普六寓至再而三猶恐泄邇而遠忘  
也蜚麟蜚鹿占大目告習祥彙載

時邁河宗執璧旨母順軌壯棹午貫康度地昉升敷  
教之臺風人兩人溥將十賚灝灝乎寫田闡谷罔弗  
荷龍銜之炤而天下咸戴

皇帝之仁經緯陰陽鉤撓河雒融運

睿藻章倬天漢壁府張華奎躋富製迺釐定載籍治  
埴百代甄鑑謨典以圖禮器采鐘臨江琢琯和闕考  
律中聲元音允繇而天下皆述

皇帝之文參旗遠揚義征不諛蹴卽籠摧滴博矚天

山奔濛汜盪雷翥以爲池平阿耨以爲田渥水徠駒  
玉河輦琛蟬封紆綬翎侯拜牙迎噉貫嚼易於策蓼  
箠而馴羈羣留屯則壤鑄泉通賄計越經躔殆數萬  
里而遠而天下咸震

皇帝之武數者得一足以統和天人聲溢宇宙招致  
貞符而

皇帝綜之猶且續無逸訪未央殿最定銖銓刑賞辨  
毫髮日慎一日匹諸重曜屢照而彌輝二儀久運而

益泰傳曰王者必世興仁丹書曰恭則壽然則宵雅  
之肄天保召虎之祝萬年允宜今日金韜西仲觚蠆  
旦中旬有三日南極朗於弧南占曰壽昌侯誕

聖之辰撓甲至是周焉先是諸王公卿岳牧庶尹僉  
爾而進曰

皇上欽若

乾序煦燾景屬久道化成茲者璇璣肇紀貞復起元  
萬寶穰穰烝黎訢訢羣臣願以次獻兕觥攄曝枕檀

林菊部咀饌熙景增綿

洪算羣臣幸甚

上曰俞咈哉朕夙夜祇祇愉愉懌懌承

皇太后歡以天下尊養三十五年矣克迓

鴻貺歲重光單闕天地見于復

慈寧綏介入袞朕將率中外王公介藩寮采舞綵晉

觴祇上

徽牒與天下同愷仁壽而緝純嘏毋以朕生辰勤問

閭弛職業于是

賜醕元正百工聯席玉璫綴華陽旭冠珥瑤甕在庀  
嘉樂具縣

聖母之惠示焉賦免九圍俊登兩科鳳紀增錫齡之  
帙句園空貫索之次

聖母之澤播焉導掖

安輿展謁

神闕九十九澱東西最宏肇秩殷禮載俟

慈航循廣瀛池延於左輔棄陽敵鯀

聖母之禧凝焉至若閩耆牂樂淵僞曼齡薊士大耋  
喁喁觀光旌閭增秩而歌鹿鳴者左右史簪管有弗  
勝錄夫妙合貞元景運也

慈暉雍豫神契也諸福璣貫保佑

命申殊祥也恒言不稱歸美

思齊懿德也昔華胥之啟春皇女登之昌炎精符寶  
之誕帝軒星娥之毓少昊慶都兆三河之觀握登衍

重華之祜修已感珠薏而文命採芑簡狄得瑤筐而  
武湯協祉祿祥履武嶽音京室是皆仁施垂裕宣光  
毓聖而彭鏗斟雉止進祁幄鱗魚錫宴弗述文母意  
錫類不匱雖上聖猶有缺與彼蕙莆生厨馱騶遊椒  
三足鵝樹焯烔丹騰以儼

福紀常物稽之故云云亭亭侈陳封巒鄣禾里黍卮  
言詭譎固

聖世所撫屏乃宣尼言仁者樂山而壽巖巖曾詹錄



注長生玉策金函探迎鴻禧又烏可已哉

聖日方中

愛景昭融資元自東壽于岱宗

皇上八旬萬壽文

謹序

趙佑

天祚

聖清萬年景祐

列祖

神宗肇造丕承以奄有區夏環海內外日出入之鄉

莫不戴

尊嚴奉

慈怙

皇帝御極五十有五載是符天地之數

八表既開庶徵畢來

耄而猶念勤以忘倦

寶章再鑄

鴻眷益駢於是

慶典紛煥

渥膏瀟淪騰歡雷殷獻頌雲屯三多之祝願猶虛不

若我

皇之克臻其實也九如之稱引猶隘不若我

皇之克備其全也

小臣

不文誠歡誠忭謹拜手稽首

上言

蓋

臣

聞六經言福壽者莫著于詩書二雅之教日報

以介福萬壽無疆曰壽考維祺以介景福皆言古人  
君能敬天祖虔享祀有恩澤以逮下於是乎人和而  
神降之福也然考其事多爲告利成酬燕勞不過臣  
子善頌善禱之詞而非確有可命之名可紀之數以

見其如何福如何壽也誠以福莫大于壽亦莫難于  
壽唯其不可必得而矜言之故洪範陳五福特先之  
以壽而揭其義于皇極之疇曰皇建其有極敘時五  
福用敷錫厥庶民止於至善之謂極無所不用其極  
之謂建敘者敷錫之本敷錫者敘之用蓋由一人之  
福以爲天下之福而卽合天下之福以成一人之福  
福無窮壽亦無窮非建有極不能洪惟

天之于人君無不予以無窮之福而獨于我

朝常旋至而立應于我

皇上更有加而無已者若

天之報之實

皇之召之

皇旣無所不用其極則

天亦無所不用其極

皇之所自造遂爲

天之所不違則五十五載中所以凝承

昊貺合德無疆誠有非名言所可罄非前古後今所  
可擬者矣夫古之克享福壽者莫如堯雖舜猶覺其  
不逮下此而周公作無逸舉其人則若殷王中宗及  
高宗及祖甲及周文王詳其數則或七十有五年或  
五十有九年或三十有三年或五十年厥惟中宗之  
享國足繼堯後而後此漢唐以下無足繼中宗者卽  
有年逾七十如漢武帝梁武帝唐明皇宋高宗元世  
祖明太祖六帝非惟建極之德本不足比隆卽其享

國之年亦不能多紀是則我

聖祖仁皇帝

聖如神仁如

天由

冲齡踐阼以至六十一年大哉誠爲殷周以來

建極之

一人也而我

皇上聖以繼



聖事事本于法

天繩

祖蓋自懋膺

主器之初卽有默契

天心之祝爰以

健行不息之德益著

化成久道之符前此

寶勒稀齡旣積四百餘之甲子今茲

算增上壽儼登八千歲之春秋不尤直接古皇而漢  
唐以下之君誠有不足論者哉且夫帝王之所謂福  
與壽非徒身其康強已也必將保定孔固單厚多益  
遠則萬方樂化國之舒近則一家大本支之慶周南  
之美文王是以由公子而兼及公姓公族說之者曰  
姓之爲言孫也族則曾元之倫也蓋周家數世之仁  
具見其中矣然考文王當日究不過詩人頌禱之詞  
而其實其全罕可述焉豈惟文王卽上而中宗猶是

也再上而堯亦猶是也下此而漢唐以後六帝尤其  
易見者也唯我

皇上振振之趾

五世迭仍焉詵詵之羽

一堂咸集焉而且先甲之年早麟符之特啟後庚之  
歲行鳳卜之方滋是又詩所云子子孫孫勿替引之  
爾雅釋之以永無極者也

臣

竊稽史古人主之惑往

往侈疆土好符瑞而豈如

倫序之完直上祥也

燕貽之遠展長樂也由是而

升中以告虔則神效其靈非封禪之繁也

行慶而施惠則人順其則非驩虞之小也以至廓

聲教可訖之區來從古不賓之國一皆

聖天子之巍乎成功煥乎文章默運于無方而駢轡

爲有象者而

壽不誠臻其實

福不誠備其全矣哉然而我

皇上猶日兢兢于法

天繩

祖而不自已

臣

嘗敬繹無逸之美四人迪哲也而必

推本于知稼穡之難小人之勞一再曰不敢荒寧不  
敢遊盤皆言無逸所以致壽也我

皇上則愈壽而愈無逸書之無逸以爲戒勉之詞

皇上之無逸則爲安行之至蓋

嚴恭寅畏之心懷保惠鮮之理而積之以

純常敦固之氣閱五十有五載如一日亦既萬民之  
無不和萬邦之無不正小大之無或違矣而所以致  
乾惕飭贊襄者彌無所不用其極凡見乎

欽頒諭旨與夫

御製詩文所謂猶胥訓誥胥保惠胥教誨天下皆可  
得而喻也萬世皆可得而法也

臣

以庸愚微末屢邀

恩寵謹自庚子越甲辰乙巳三

進序冊深維

乾坤之容

日月之光雖極藻續鋪張不足以當一辭之贊唯是  
推明詩書所述無逸不已之理希妄測

高深于萬一今復越十年而

聖德之彌高彌劭者益非名言所能罄雖由是而  
九表而百齡以及于無窮總無以易于

聖製八徵耄念之寶之三義也臣方備員江介職在

斯文敢不益勵冰淵恪遵面奉

恩訓諸事認真加倍謹慎之

諭以期仰答

壽考作人之盛是用懃竦震動寔實無華繕呈

宸覽竊幸遭遇之非常敬效賡颺之無旣云



平定兩金川文

吳俊

昊天無言於穆清寧迴泊沿乎四游晃朗耀乎三精  
下俯亦曰蒼蒼物雜撰而自以爲名角距牴牾猛噬  
驍騰陰歆陽照亭毒流形智慧蘖歟血氣牙爭此林  
林總總皇穹不能形理求肖厥德者爰集於我

大清

列聖傳序超軼紀載龐德鴻庸彪炳岱

皇帝御宇重華繼代滋液滲漉靡有內外譬如依被

曦魄莫測其光景邈處翕闢迺忘其履戴者矣若夫  
天有欃槍地有豺虎腥臭之所聚屯山川之所掩阻  
則度外置之封以丸土已爾迺非人倫而衣冠混百  
獸而言語爭蝸舍以噬鄰駭麀衣而吠主則羊鞭後  
至馬戮驚羣

皇威燁赫電掣霆奔撻伐所加雖槁葉之隕颼風輕  
羽之迎烈焰無以方其迅疾也前者拔達靖葱嶺傾  
淮噶犁掃回部款誠窮磧萬里邊烽不驚鄂爾淖爾

隰臯旣牧天山南北蕃落以平斯則燕然勒石戶庭  
之闔耳狼居稱封藩籬之志耳縱誅斬草昧剗鑿鴻  
濛指崑崙以爲家環星源以作宮烏有若是之浩兮  
蕩兮決莽弗可形容者哉金川小醜負險恃固部邇  
冉駹亘逼大渡域塹所畫天地之界自秦闢蠶叢漢  
通邛笮未遑條其山川中其肯會及乎沐浴大化則  
羈之絡之篆之擾之信誓旦旦弗觸弗背矣旣而自  
作不靖鄰封肆啟櫪馬爭蹏詭銜竊轡

皇武旣張委命請吏許瀚癥而濯垢未禽獮而草薶  
是乃

神武不殺豈直三驅之失前禽兩階之徵干羽而已  
夫獮狙冠服裂之安也螳蛆芻豢哇之甘也故促浸  
構釁始於革布什咱分背相踈終與僭拉交頸相靡  
其間明正木坪之倫與之衡扼丹巴沃雜之屬爲之  
介倪於是陶誕突盜闖扼驚曼睢盱相視壽張爲幻  
螳蝮饕餮殺人而嬉目熒四鄰氣吞九司蕩人曷場

畧人女妻黥者煽於毒燄弱者肉於刀機於是

皇帝乃命將選鋒整旅詰奸金鼓所震摧礪裂巖收  
明正下資哩復革布氣斯振矣據美諾克木達威斯  
宣矣擒澤旺走僧格桑力斯舉矣然而梟酋索諾木  
猶敢以褫魄之餘啣沫窮竄之驚魂肱支僭拉之賊  
目熒惑美諾之降徒將欲返榆燄於枯葭當椎輪以  
螳臂非鬼非人如羹如沸旣媾旣婚若兄若弟譬茲  
蠹哉貫盈於自大而詞托於同病心險乎山川而朋

彙乎梟獍雖蠹肆其奸而不知

天已訖其命矣

皇帝遂詔定西將軍阿桂由南路移師進攻嫺整鳧  
藻精練熊熊氣抗崇山聲摩層穹健銳火器諸營淬  
其鋒吉林索倫諸軍礪其鏑三秦三楚諸鎮枕其鐔  
滇南黔中諸隊襲其缺運以

神謨揮以龍韜洪決崑岡纖劈秋毫九地潛攻九天  
招搖赫赫烈烈洶洶旭旭曾不旬日而賊已空其巢

於是谷噶批馬尼割羅博驢喇穆析康薩脊解木思  
尻劈支斷溯普胸刳默格昆色胸而用燔茹寨腴而  
可食菑則髡大海歟莫不股判肫分脂剔骸折賊巢  
勒圍旣已覆滅獸困而守險鯨奔而沸波衛舍齊與  
雍中意負嶠而誰何地羅天畢水斷陸絕煙騰霧腥  
木灼草赤天地之所震眩精靈之所駭懾幽嚇魑魅  
明拉崖壁而後性戒自戕籲逃伏鎖詭捧印而鞠跼  
猥械脰而關膝懿五稔之役萬里之師百戰之烈逮

茲而始卽天風飄颻送旋旆也猿鵲吟嘯和凱饒也  
左簞右壺勞

皇旅也巴歌渝謳揚樂愷也覩斯烈也所謂鴻鑠龐  
隆不可殫之顯庸矣且夫摧危殲伐叢莽非如刳單  
于磔屬國之游牧而更習人懸車士束馬非如驅橐  
駝燒螻蟊之卧戈而據鞍用力甚勩集勲若斯唐哉  
皇哉侯其禕而然而

皇上抑乎虔輦深思無窮



兩陵申告則曰是惟

列祖垂馨烈焉羣臣歌頌鴻懿則曰是惟

聖母篤慈祐焉青氣上屬榮光升邱則曰

蒼帝報瑄薌焉奠于素王在泮樂只則曰好謀必克  
符聖契焉虔劉不庭嘉勞勤恁表厥懿綱是用錫之  
殊等焉敷宣景耀答庥垂光是用鏤瓊冊崇

徽稱焉方是時也草木鳥獸歡喜懌悅嶽靈瀆神昭

應安帖

臣

備員省闈覩

皇上穆穆之光退而聆樂章於太常猗歟休哉洵

天清之融祉

聖皇之恢綱也雷電竟天而天弗庸喬嶽鎮地而地  
弗功大矣至矣夙矣高矣

九徵

于敏中

有華衢叟者遊太和之宇以恬以休或歌或舞過石渠文學而問曰方今景氣旁鬯羣形蕃滋跂喙蛸蠕靡生不熙小人猷猷長養以迄期頤氤氲融融怡怡意天實納我以福林育我以壽宇顧頑素駢淺囁嚅莫形其衍凱軒翬罔測其端倪子曷示我偉兆而擴我識知乎文學曰叟徒樂茅檐之曠溫而未矚曜靈之蒞煦也安蓬樞之窈窕而未闢泰鈞之帡幪

也葆大年娛化國耕腴汲甘所作晦息扶鳩而嬉婆  
娑黃髮亦知

聖人在上無一夫不被其澤者乎叟曰小人幸承下  
風亦竊聞

主上之聖而未能言其所以聖也文學曰醇醲斟酌  
非勺蠡咀也竿策總攬難更僕數也走忝侍從依光  
左右無名之名薰心沫口皇極休徵徵之以九叟敬  
識之用介

眉壽叟曰小人結轡自守懇欵者久矣齊心飫聰請  
從子後

文學曰萬物孳萌睢睢盱盱

聖人首出闡珍握符彌綸萬有亭毒漬濡草木咸若  
逮於禽魚念罔闕於幽遐患弗罔於方隅從箕離畢  
厥好是圖故咨牧劭農求莫也蠲租賜復流渥也振  
窮賙乏軫隱也協中胥匡化博也於是和氣薰蒸元  
功普施十日五日雨風惟時黍稷高杭下梁先稷遲莫

不繁殖弗爽土宜自郊畿達乎郡縣困饑充溢鬱如  
京坻且玉關以西佃疆新闢亦已大穫來藜函其萬  
穗郵於京師惟年豐而人和蓋仁壽之應而明昭之  
貽也叟曰大哉仁乎小人飲食醇化未燭厥理誠不  
免於氓之蚩蚩也

文學曰循蜚疏佗以前邈不可得而述矣粵若堯兢  
兢舜業業塗山胼胝以劬景亳召爽而懌姬文卽功  
至於日昃丹書旣陳敬勝者吉靡不德施曼壽流慶

烏奕繫我

后之克勤則固凌轢三五連蹕曩牒以符乾苞而不  
息也緬夫勵庶政懷永圖惟日孳孳匪安匪舒問庭  
燎而求衣珍寸陰於挈壺搏桑昕瞰奏牘敷匭  
手批口答決如流水前

宣席以掄對咨密勿而進止迺簡衆寮程材任使甄  
鑑臨軒威顏尺咫曾不遺乎百夫之長一命之士綸  
章每裁於日晡郵囊或啟乎中夕而衆務待酌劑者

時御應臯而臨決

踐阼以來蓋二十有五年如一日其勲懋也如此而  
溫室猶輯夫四箴黼展恒銘夫無逸是以工釐績熙  
化行治洽誕日新而月益也叟曰吾儕小人三時拮  
据且得八蜡之息

聖人之勤乃無間於晷刻乎

文學曰盱眙其咨政旣懋矣府事允諧民旣阜矣而  
一人復繼繼焉厘褻卑或阻乎廉逖或翳於蔀爰諏



爰度芻蕘是取曰稽載籍乃

巡所守於是揚和鸞乘時龍省騶御飭躡蹻行不踣  
途頓無待供兌說以澤巽申以風青皋俶而覩土白  
藏斂而告豐如晏嬰之所陳軫補助於扈農睠澧鄆  
之磅礴陟臺懷之寵從景孔躡於尼防寧嶽圖於岱  
嵩淮海維揚三江旣入閭闔隱賑載觀載勗洮縹沐  
靡俾家給而戶封

澤滲漉慶豐滂載筆者殆莫罄其揄揚之雍容而瀾

安於河民按其堵則賴

省度疏濬以大纘夫禹功走不敏嘗從八十一乘之

後聽輿人之謳曰芃芃者茁甘雨之濡甘雨之濡

天子之車車之來思父母之懷思其翹頸企踵以睇

光而獻榮者喧呼嗶嘑蓋萬口而一聲也言未已叟

乃歎焉興曰禕而禕而堪堪羣生咸貢其情小人亦

願偕彼儔侶鞠脰于隅以將葵藿之誠

文學曰未也夫沕滴曼羨淪於肌膚者非簪之所能

歛也醴粹契緯凝於旭卉者非牖之所能規也龐鴻  
幹運盅和烟煴

聖憲

昊穹承其殷純吸噓徹於穆清祗兆炯乎幾先淵蛸  
濩穫之中祇祇威威動罔或渝靡得而言詮矣若夫  
園壇迓釐肅共精禋肇蒞齋宮盥眎是親質明將事  
燿火燭田蕭薌配藜肸蠭懿芬修龍見之常雩舉祈  
穀乎上辛伊陶匏之告虔實普淖之孔存是以靈靈

應禱若響斯答而祐順荷寵全付所覆以禔福我

信天主人叟曰

聖人如天信蕩蕩而難名也

文學曰叟既知天試與叟推

景命之原申受祐之實高山發祥聿惟長白

太祖

太宗幽岐荒作

世祖應天順人肇造紃埏鞏丕基於磐石洪惟

聖祖仁皇帝榮鏡世宙仁覃恩洋於赫顯燦我

皇岐嶷誕聖歲宣重光邁卿軋景暉元會之運躬豐  
芭燕詒昌大之慶膺

篤眷之鴻貺彰純龐之令望猗歟茂矣亦越

世宗建極匡勅萬邦方育德於重華締寶構而肯堂  
聖承

聖以揆一所以軼成周之覲揚也昭哉紹庭儀型作  
孚贊德言之徽徽日鋪聞夫訓謨象魏令甲適崇球

圖是以述續作緒守兼創模調幕轅於熙洽坂章廟  
於爻間也叟曰我牽車牛先疇其服之孝孫有慶  
聖人其篤之

文學曰是未足以貶

聖人之孝也順德備躬性源敦厚錫類教愛式訓九  
有以天下養敬奉

聖母適溫清視起居寢門三朝離離愉愉侍

慈寧之膳掖

大安之興盎然春暉萬年樂胥讓善歸美藝章聿增  
迓無疆之繁禧晉有赫之

徽稱寶冊璘璣采芝英蓋自翠瀉丹水以還固罕  
得而比衡矣協氣所浹祥符畢臻獲瑞麇皓質於椒  
苗古槐槁柯於黌陬有八世萃睦之戶閭有百齡胖  
樂之毗是豈直鉤鈐耀芒萁蒲扇莖所能嫺其嘉徵  
者哉叟避席而稱曰

聖德備矣叢床至矣請從子效封人之頌獻公堂之

兕

文學曰居叟知

聖孝未知

聖學也且夫象緯麗章螢燭不足語於燿潏潏滄藻  
睢渙不足彰其文故觀化鏡川赫熒灝瀚厥惟天縱  
之

聖人是以徇齊敦敏遜志念典哀日知之說釐樂善  
之集在養正而已勤泊乎



御蘿圖握珠囊紫機燕閒不忘就將網羅祕文經緯  
邱索罔不晰乎豪芒通篆籀乎國書訂韻統以同文  
圖禮器於甲觀定鐘懸於太常考續文獻鑑衷要詳  
嫿嬛擷唐宋之醇奎壁顏三希之堂莫不鱗鱗炳炳  
彬彬琅琅若夫經筵發揮研京醲郁功銘辟雍惑開  
褒博以及伊犁之陽格登之麓伊西庫爾葉爾奇木  
豐碑煌煌崖磨壁畫冠承趺之最鳳紉覽輝之鸞  
則又沛若涌泉成於刻燭者也及夫

元音縕風光藻挾天六藝笙簧五際陶甄歲月論帙  
甲乙列編紀事則史遜其核體物則疏遺其筌故使  
傳誦者操觚而忘神賡颺者授簡而汗顏矧夫金生  
玉潤龍跳鸞騫墮糜日供尙卿時宣縹緲裝池固已  
高於羣玉之山者乎壁府騰精護以五雲輪囷蟬聯  
漢倬秋旻標槭樸者所以占壽考而歌作人也叟曰  
小人苗裔是業若此者信聞所未聞

文學曰我聞在昔有文事者必有武備今更與子言

聖天子經文緯武之治赫矣

神武天錫勇智撫承平之泰宇虞恬熙之弛志故觀  
德而習勞每率先而身示也於是

臨苑門開廣場龍驤旣掄狸步斯張期門攸飛比耦  
綴行爾乃玉韞欻芝蓋從御夏服彎唐弓白羽抨星  
鳴鶻踞風剡注參連雋於環中雖由基穿楊曾不足  
以喻其工焉迨乎秋郊行獮獮獲表暇車徒鴻綱罕  
旂郅偁駒秣大宛駿差拔達沛艾鞞雪倣展軫而諏

發興桓之東地惟木蘭衛以儲胥絡以岡巒麋鹿麋  
麋充物乎其間爰程日以迺圍騎駢衍而草山三驅  
未逮乎周陟而擲者搯者擣擣者挂挖者蹂蹈者他  
他籍籍已阡填而谷殷大庖旣盈乃縱其御詘恣莽  
答以盤桓是殷綱且莫伉其仁而豈上林長楊之誇  
張者所可同日論哉叟曰諺有之得逸於勞惟以永  
年乃文乃武是爲

聖人小人耳溢殆若渴者飲乎江湖而饑者饜乎鼎

烹至哉乎德雖古詩書所頌史冊所載又何足云  
文學曰謠衢歌風黎獻之誠鋪揚景鑠以愬叟情請  
復告以

武功之成爾其裨瀛澄恬泰階登平梯繩驟塗鰈鵲  
實庭稜威懾於番碣冠帶奉於泰西大漠以北敬闕  
而歸化者迺通乎車楞於是四衛拉特相率面內絡  
繹懷音屬以淮夷內訌不靖厥下拯塗戡亂師出以  
貞故矢石未交壺箎載迎遂俘名王而底輯寧也旣

而哈薩繇布露服貴嶠渥池咸安其生蠢爾和卓孤  
恩抗顏是用有不聽之征

王師桓桓號如雷霆望風而款降者厥有和闐六堡  
庫車諸城惟時兔棄其窟獸喙於莽襲躡剪刈洗潰  
奮武至於素爾坦沙之部驚慄赫濯獻馘稱臣乃洗  
兵而振旅築壇

勞旋凱歌饒簫紫光茗亭颯爽弓刀五十功臣  
天言衮衮出師未逾五年拓疆越二萬里蓋皆集於

握鈐之獨斷與夫應機速而賞罰不滯也天瑞貺地  
寶出時膏零於炎州靈源騰於戈壁五里豁霧三河  
貢璧圖法通普爾騰格之制金鏐更麟趾裏蹠之式  
以及烏紇之圭嚙嚙之劄莫不麇集是豈張騫鑿空  
傳志西域之所髣髴哉時則物樂由庚序調執徐熒  
熒壽星麗於南弧寶籙維萬大衍兆圖詠蕩天閭慶  
儀誕敷乃有纏頭之倫冒形之徒錦罽颯纒襟侏酥  
囉咸驩忻而效維嵩之呼也於是華衢叟嘔喻聆悅

盤辟雅拜載忭載趨手額拊節而歌曰天之清兮日  
之晶兮

聖人之生兮天之久兮日之旭

叶兮

聖人之壽兮石渠文學依聲而賡之曰

聖人之徵兮徵則久兮黃鍾根萬權興於九兮億秭  
京陔積以阜兮華衢叟復從而和之曰穀之九兮屢  
豐於晦兮穀萬萬穗穗萬萬茂兮如

聖人之壽兮



九敘

謝壩

吳淞漁叟攜李老農比屋而居錯壤而畔身閱

三朝齒皆百齡

鑾旂至止抃舞而迎翹瞻

雲日浸潤醇醴

鑾旂將旋跪送於垆若戀父母赤子之情乃握白金  
衣黃衣遊乎春臺休乎康衢已而率子姓理綸竿課  
錢鏹相勞也復相樂漁叟乃攜酒與魚刺船於桑陰

之叢薄要老農而觴之旣醉乃謂老農曰快哉

盛世乎今

萬歲時巡此邦於茲凡四德日新功彌熾草澤小民  
蒙被

大清之德物湑鬯羨不可殫紀何有疏仡循蜚尊盧  
赫胥之年素雉朱鳥元秬黃葵之事然而戴高履厚  
者不測覆燾之跡沐日浴月者莫窺運旋之軌蒙壹  
不知夫

帝力之何有也何本何化何修何飾而臻厥成如是  
以蒙所見聞者蓋曠古未一逢之

邳治子亦有所得於逖聽之餘乎試爲述其一二老  
農蹶然興曰是典也懿矣嘉矣軼勳華兮上理之原  
莫得而縷覩兮若夫象魏之所布巽風之所加

惠心之所浹王禮之所施巍巍乎宏廓純溥普汜無  
涯走竊聞諸道路而不能遍給以齒牙盍請誦其所  
聞爲吾子道其樂嘉

老農乃稱曰古者盛王巡狩先期戒曰各修平乃守  
不共有常刑用以儀羣后是故有加有進有削有討  
以朝於方岳之下今之

鑾輿未啟渙其大號供頓毋靡間左毋擾入疆之始  
慶讓斯備黜陟惟明以迪大吏董正治官展采錯事  
惻惻而明農者登浮僞而浚民者退康侯三接

龍章光賁清問下民井牧之寄始自京畿以達於吳  
會來咨來茹敷奏明試滌除微瑕甄錄宏美凡百臣

僚疇不鏡于至清靖共爾位考禮正刑一德以尊於  
天子展義巡功莫與擬矣

漁叟曰置吏以牧人也省方以觀民也古稱狩者牧  
也巡者循也恐遠近不同化幽隱不得所故必躬而  
必親也乃者布和正歲

減澤式頒循昔典以布之既耕九而餘三除其積負  
彌軫元元撫降康於稔歲憫歉歲之維艱免正供之  
億萬邁前度而施恩優渥載沛渡淮而南或因三而

卷之二  
三  
積五或倍五而悉蠲復嘉樸俗循分輸將雨露滂洽  
補助無方

行慶施惠衍溢江鄉蓋會計者不能枚舉其萬億垓  
極而徧德者無不倍羨乎坻京茨梁則在昔所傳道  
德太平牧人而爲天循行者非夫淵懿之旁魄而  
聖猷之景章者乎

老農曰豈惟民哉設教爲觀興文是尙是以陳詩觀  
風型仁講讓鼓之舞之吉士勸相方今類璧之內膠

序之中

文思光被橋門雍容

皇帝顧而嘉之乃

命舉明經之士不遺乎彈丸之封都都邑邑子衿如  
林廣闢禮羅數溢

恩覃博士弟子伍五參三別有俊髦之英陶詠文質  
潤色湖山黼藻日月於是乎

臨軒試之蜚英聲騰茂實蓋朝披褐而夕紆紱者接

跡也夫是則藝圃飽其道腴文圃汎其德澤洵稱作  
人之極軌而賓王之殊格也已

漁叟曰諒哉抑搢紳先生士之冠也我我老更駘背  
黎面

天府圖形香山

錫宴扶鳩趨迎率先邦彥

賚以崇階于胥燕衍逮幼子與童孫賓賢能以應選  
彼都人士褒衣博帶並棹聯鑣望塵境外共識龍驂



遙瞻羽蓋第嘉頌於

堯天傍豹尾而羅拜文綺章身荷囊結佩封題雲集  
承筐麟萃慶小大之具邇聯上下之交泰蓋溫旭所  
照臨遍乎胥爽閭昧斯又庥和協朝野而

慶賜無疆界者矣

老農曰匪直此也自上下下益道溥焉精鏐爛然詎  
惟分帛孝弟力田洸洸戍士赳赳武夫憫勞扞衛載  
展糧儲榜人權師謳歌揚旂容與利涉龍魚不驚然

徒楫之恬波鏡平爰增稍食勤力是旌乃至貿遷之  
儔闐闐之族樂

萬乘之來游喜阜通之致足獲居竒於三倍曾不優  
其半粟下逮負擔蚩氓傭保僮艮含醇飲和熙熙鼓  
腹蓋漸漬霑漑者周徧於纖悉幽微如造化之亭毒  
焉何品不榮何生不育則又遽數之不能終物悉數  
之亦未易更僕也

漁叟曰惠愛之施允矣無遺保障之謀抑又勤思在

元默敦牂之歲紆

玉輅於水湄登尖山以望海鹽壽輦固於金隄茲行  
繼之先務是惟觀水之濶物土之宜惟捍塘之層層  
厥坦石之攸資故爲川者導之善防者厥之豈獨迤  
衝險要之孔亟洵乎度全勢而擴宏規匪增卑與培  
薄在補闕而完虧夫又何竹之捷何石之犀斯迺  
明德之厯於先事而無待於其咨者乎  
老農曰民生之奠神所胙也子亦知夫

精意之格幽者乎懿薦馨於

春禱升普淖於蒸煇通肝鬯以合漠卜萬福之來求  
青陽協吉初辛載謀以興嗣歲以迓天庥然後望於  
岱宗秩於

孔門河海晏夷懷柔百神仰古帝之祠宇祀昔聖之  
邱墳及乎國之先臣咸秩無文岐途

命使殊禮孔殷亦有

俞學臣之考稽褒名儒之遺跡崇廟貌之輝輝榜

天題之奕奕禁樵蘇於土壟極表微於淪寂所謂協  
陰陽之原而通神明之德者不亦赫乎

漁叟曰元化叅神此敷天衷對所由基也若震疊之  
及乎邊濶者又親見其惕息慙伏於

明威也期門七萃在子前兒侮食左言稱警先驅蓋  
此已覩夫負弩屬囊而參陪乎獲畧葳蕤之內者今  
之漸摩涵煦奔走偕來無不革鷄音而列鴻儀也下  
有都盧尋橦緣竿舞絙之伎跟挂腹旋猿騎鳥駛槃

舞角觝怪獸舍利眩目怵心不可逼視此固亦絕域  
所流傳而

聖皇御之同於昧任侏儻之遺意云爾

老農曰德及於遠者化自近也夫拓疆數萬里而使  
之于于來賓者吾

皇之恢

祖烈而隆

慈慶也聖人之德無以加於孝請爲子舞蹈而竟之

首春戒塗月華燈輪九旂雲罕

輦路無塵攬民俗之洪厯接景物之明暄山川暎發  
花木吐芬計初巡以至今厯三五之令辰維受祉而  
逢吉欣

春暉之長延天下爲家莫大尊親惟辟玉食恪共晨  
昏是故

帝德之儉卑宮菲食帷幕帟綬謹度以制吏念  
溫清弗敢怠事樸而有章華而匪侈

賜金增秩以宏錫類禮成

旋蹕式承

慈豫億萬斯年大孝不匱猗與

愛日之無疆而萬國歡心所由畢萃矣

老農之詞未畢漁叟乃輟然喜曰廣哉熙熙乎

至德綏矣膺蕃釐矣民物殷阜年穀時矣陟禹之迹

無不宜矣乃相與歌曰吾

皇來嘉惠裕



巡之周天時具四象生積無數我漁蕃我農熟有嘉  
魚有嘉穀長子孫禔

景福